

29 AUG 2001

SAJAK DR MAHATHIR MENGENAI PUTRAJAYA

PUTRAJAYA, 29 Ogos (Bernama) -- Berikut ialah sajak nukilan Perdana Menteri Datuk Seri Dr Mahathir Mohamad bertajuk "Di Atas Runtuhan Kota Melaka Kita Dirikan Putrajaya" yang dideklamasikan beliau pada malam penutup Pesta Puisi Patriotik 2001 di Taman Putra Perdana di sini, malam ini.

Di Atas Runtuhan Kota Melaka Kita Dirikan Putrajaya

Demikian gema gempita semangat merdeka  
Kuasa sudah pada kita  
Ayuh kita hiasi wajah bangsa  
Dengan jurai-jurai kilauan permata

Kian jauh menyelusuri zaman merdeka  
Kita jadi semakin mengerti  
Semata-mata kuasa di tangan bukan pertanda bangsa berjaya  
Kemiskinan, kedaifan, kejahilan dan timbunan peluang tersia-sia  
Mandamparkan bangsa itu  
Pada taman asing yang mereka pertuankan  
Yang lain pula menjadi gelojoh  
Oleh runtunan haloba segalanya mereka rempuh  
Menganggap diri mereka panglima belantara  
Pada musim kemarau nurani  
Embun serta keringat merdeka tidak lagi sudi menitis

Melayu tidak belajar dari sejarah 450 tahun terjajah  
Mewarnakan sejarah mereka  
Dengan dendang dan hiburan hati bangga  
Tentang ceritera dongeng yang mereka cipta

Yang remeh itu utama  
Yang utama itu remeh  
Yang kecil itu di alamkan  
Yang alam di hamakan

Melodi ceritera yang sungguh mengasyikkan  
Kata mereka: Takkan Melayu hilang di dunia  
Sambil menggigit jari jemari  
Mereka pun menjadi kuli di negaranya sendiri  
Lama sudah runtuhnya Kota Melaka

Kita tidak kembalikan kota itu dengan papan di Jawa  
Pun tidak kita bina tugu ingatan  
Di Prang Besar kita tiada selera berperang  
Dengan tangan-tangan halus arkitek anak watan  
Dengan iringan doa dari rekahan bibir  
Petani di bendang  
Nelayan di lautan  
Di sini kita bina mercu tanda bangsa

Suatu gergasi megacity

Suatu jaringan menjangkau seluruh jagat  
Suatu taman himpunan segala bau-bauan jutaan flora  
Suatu simbiosis insan dan alam

Kita namakan sempena nama bapa putranegara

Putrajaya  
Lambang negara bangsa merdeka  
Di mercu ini kita zahirkan senibudaya bangsa  
Dengan segala kelazatan muzik alam  
Serta hidangan dan hamparan seni taman  
Bersih - indah - tertib - teratur  
Adunan tamadun tinggi  
Jumlah segala cita-cita dan harapan  
Membongkar segala-gala yang telah hilang  
Dan kita tidak payah mengambil nyawa sendiri  
Untuk menebus maruah itu

Dari sini kita menyusun langkah dengan yakin  
Membina bangsa dengan cara kita  
Bangga dengan apa yang ada  
Menghadapi cabaran dengan segala ketahanan  
Cukup tangkas menangkis dari menjadi korban kali ke-dua

Putrajaya  
Lambang negara bangsa merdeka  
Putrajaya  
Lambang negara bangsa merdeka  
Putrajaya  
Lambang negara bangsa merdeka

-- BERNAMA  
HK HK NAK